

Hampir semua lulusan perintis Kolej Yale-NUS dapat kerja dalam enam bulan pertama



PELAJAR PERINTIS: Kumpulan pelajar pertama di Yale-NUS telah memasuki kolej seni liberal itu pada 2013 dan lulus tahun lalu, dengan 93.3 peratus daripada mereka mendapat pekerjaan dalam tempoh enam bulan selepas peperiksaan akhir. – Foto fail

LEBIH sembilan daripada 10 lulusan kohort perintis Kolej Yale-NUS memperoleh pekerjaan dalam tempoh enam bulan selepas peperiksaan akhir mereka, menurut tinjauan terbaru pekerjaan siswazah.

Tinjauan yang dilakukan November lalu mendapat lulusan daripada kolej seni liberal itu memperoleh gaji bulanan kasar sebanyak \$3,500.

Secara keseluruhan, kadar lulusan yang mendapat pekerjaan ialah 93.3 peratus, dan ini termasuk mereka yang mendapat pekerjaan sepenuh masa serta kerja sambilan atau bebas.

Menurut kajian itu, gaji permulaan median lulusan Yale-NUS yang memiliki Ijazah Sarjana Muda Sains dengan Kepujian ialah \$4,083, dan \$ 3,500 bagi rakan mereka yang mempunyai Ijazah Sarjana Muda Sastera dengan Kepujian.

Seramai 106 lulusan – daripada jumlah 119 – menyertai tinjauan tersebut.

Yale-NUS ialah kolej autonomi di bawah naungan Universiti Nasional Singapura (NUS).

Ia ditubuhkan pada tahun 2011 dan menerima kumpulan pertama pelajar pada tahun 2013.

Dalam satu kenyataan semalam, Presiden Kolej Yale-NUS, Profesor Tan Tai Yong, berkata:

“Kami sangat gembira dengan daptan kajian itu, yang menunjukkan bahawa lulusan kami sangat diburu di tempat kerja.

“Pelajar kelas 2017 kami telah menunjukkan bahawa mereka perintis daripada pelbagai sudut: memasuki kolej seni liberal pertama di Singapura dan membantu membentuk budaya sekolah untuk kohort masa depan, hingga merintis jalan bagi lulusan Yale-NUS masa depan di tempat kerja.”

Tambah Profesor Tan:

“Kami gembira lulusan kami telah memanfaatkan apa yang mereka pelajari di kolej dengan baik sedang mereka menyumbang secara aktif kepada industri berbeza yang mereka sertai.”

Lulusan Yale-NUS menyertai sektor awam dan swasta.

Enam industri paling popular dalam kalangan lulusan mereka ialah perundingan perniagaan dan pengurusan; keuangan dan insurans; maklumat dan komunikasi; pendidikan; pentadbiran awam dan pertahanan; serta seni, hiburan dan rekreasi.

Kurikulum di Yale-NUS menekankan pembelajaran pelbagai bidang yang luas meliputi sains semula jadi dan sosial serta kemanusiaan.